

**Uunga siunnersuut: Aningaasarsianit akileraarutit pillugit Inatsisartut inatsisaata  
allanngortinneqarnera pillugu Inatsisartut inatsisaat**

(Sulisitsisup akiligaanik angalancerit akileraaruteqaataannginnissaat, nalikkilliliisarneq pillugu maleruagassanik allannguinerit, amigartoorutit ukiuni tulliuttuni ilanngaatigineqarsinnaanerannik sivitsuineq, selskabit piginnittuusut iluminni nuussisarnerat pillugu maleruagassamik qasukkaaneq, erniat nunanut allanut akilikkat ilaasa akileraarutaannik unerartitsarnissaq, kapitali 3 b nutaaq, selskabit iluanaarutisiarititaminnik ilanngaateqarsinnaannginnerannik, iluanaarutisiat ilaasa ilanngaatigineqarsinnaanerannik atorunnaarsitsinermik, iluanaarutisiat ilaasa akileraarutaannik appaanermik aamma selskabit pigisat iluanaarutisiarititaasa ilaasa akileraarutaannik atorunnaarsitsinermik imaqartoq il. il. )

*Aningaasaqarnermut Akileraartarnermullu Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerneqarneranut**

**ISUMALIUTISSISSIONTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq  
Inatsisartunut ilaasortaq Jens Frederik Nielsen, Demokraatit, siulittaasup tullia  
Inatsisartunut ilaasortaq Mariia Simonsen, Inuit Ataqatigiit  
Inatsisartunut ilaasortaq Peter Olsen, Inuit Ataqatigiit  
Inatsisartunut ilaasortaq Kuno Fencker, Siumut  
Inatsisartunut ilaasortaq Karl Tobiassen, Siumut  
Inatsisartunut ilaasortaq Jens Napaattooq, Naleraq

UKA 2023-mi ulloq 28. oktober siullermeerinninnerup kingorna ataatsimiititaliap sunnersuut misissorpaa.

**1. Siunnersuutip imarisaa siunertaalu**

Siunnersuuteqartumit oqaatigineqarpoq 2023-mut aningaasanut inatsisissaq pillugu Inatsisartun partiit tamarmik isumaqatigiissutaanni immikkoortut ilagigaat nunanit allanit aningaasaliisoqartarnerata 2023-milli aallartittumik siuarsarneqarnissaan nunanillu allanit aningaasalee-rusuttunut aporfissat peerneqarnissaat.

Siuariartorneq annertunerulersinniarlugu suliffinnillu nutaanik pilersitsisoqaqqullugu Naalakkersuisut siunnersuut aqqutigalugu inuussutissarsiutinik nutaanik, minnerunngitsumillu inuusutissarsiutinik avammut nioqquteqartunik, ineriaortitsisoqarnissa kajumissaarutigumavaat. Tassunga atatillugu nukimmik tunisassiornissamut erngup nukinganik nukissiorfimmik atuisinnaanerup unammissutigitinnejartalernissaanik kissaateqarnermut atatillugu siunnersuut immikkut isagineqassaaq.

Kiisalu nunatsinni aningaasaqarnerup, inuussutissarsiutinik ikittuinnarnik minnerunngitsumillu aalisarnermik annertuumik aallaaveqartup, assigiinngisitaarnerunissaanik kissaateqarnermut atatillugu siunnersuut immikkut isagineqassaaq.

### Siunnersuummi immikkoortut pingaarerit

Siunnersuummi immikkoortut pingaarerit siunnersuuteqartumit ima tulleriaarneqarput:

- Ingerlatseqatigiiffiutigisami iluanaarutit akileraarutaasussaanngitsut aamma iluanaarutinut aalajangersimasunut ilanngaassisinnaanerup atorunnaarsinnera
- Akileraarutitigut amigartoorutit iluaqutiginissaannut piffissaliussap sivitsorneqarnera
- Annikitsumik aningaasaliinermut killiliussamik oqilisaassineq
- Erniat akileraarusersorneri (nunami allami akiligassaqarfimmut ernianut akilerneqartut akileraarutinik akiliineq)
- Ingerlatseqatigiiffinnut nalikilliliinermi malittarisassaniq allannguineq
- Sulisisumit akilerneqartut angalanerit akileraarutaannginnissaat
- Akissarsianik uninngatitsinermut qummut killiliussamik naleqqussaaneq

### **2. Siunnersuutip Inatsisartunit siullermeerneqarnera**

Siunnersuut siullermeerinninnermi partiinit amerlanerussuteqartunit akuersarneqarpoq.

Oqallinnermi immikkut sammineqarput nunatta arlalinnik isertitaqarfegarnissaanut periarfissat, siunnersuutikkut anguniarneqartut pisariusunik inatsisiliornikkut allaffisornerulernikkullu ipitinnejarnissaannik ernummateqarneq aammalu siunnersuutip suliarineqarnera innuttaasunullu kinguneri. Tamatuma saniatigut angalanerit sulisisisunit akilerneqartut akileraarusersneqarnerannut atatillugu allaffisornerulersimaneq aammalu taassuma atorunnaarsinneqarnissaata iluarisimaarneqarnera oqallinnermi tikinneqarput.

Inatsisisstatut siunnersuutip ilaa angalanerit sulisisisunit akilerneqartut akileraarutaannginnissaannut tunngasoq partiinit taperserneqarluarpoq.

### **3. Tusarniaanermut akissutit**

Tusarniaanermut akissutigineqartut inatsisisstatut siunnersummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqataanut naapertuuppoq.

Inatsisisatut siunnersuutaqqaartoq ulloq 7. juli 2023 tusarniaanermut akissuteqarfissatut piffissaliullugu ulloq 8. juni 2023 tusarniaassutigineqarsimasoq ataatsimiititaliamit oqaatigineqassaaq. Tamanna tusarniaanermut naammaginartumik piffissaliinertut ataatsimiititaliamit isigineqarpoq. Tusarniaanerup qaangiutereernerani inatsisisatut siunnersuut maanna ilusimisut iluseqalersillugu Naalakkersuisunit naleqqussarneqarpoq.

Tusarniaanermut allakkiaq naapertorlugu makku tusarniaaffigineqarput:  
 Namminersorlutik Oqartussani Naalakkersuisoqarfiiit tamarmik, kommunit tamarmik, SIK, BDO, Deloitte, BK Revision, EY Grønland, PWC Grønland, Kalaallit Nunaanni Eqqartuuussisuserisut, Grønlands Revision, Kalaallit Nunaanni Sulisitsisut, GrønlandsBANKEN, BankNordik, SISA, NUSUKA, IMAK, ASG, AK (Atorfilit Kattuffiat), Greenland Holding A/S aamma NunaGreen A/S.

#### **4. Aningaasaqarnermut Akileraartarnermullu Naalakkersuisup ilisimatitsiffiusumik ataatsimeeqatiginera**

Siunnersuutit ataatsimiititaliamut aammalu Naalakkersuisut suliassaqarfiannut ataatsimut attuumassuteqartut pillugit ataatsimiititaliap Aningaasaqarnermut Akileraartarnermullu Naalakkersuisoq ilisimatitsiffiusumik ataatsimeeqatigaa. Siunnersuutit taakku ilusiligaanerannik Naalakkersuisut saqqummiussinerannut siunnersuut matumani pineqartoq ilaavoq.

#### **5. Ataatsimiititaliap siunnersummik suliarinninnera**

Inatsisisatut siunnersuutip teknikimut tunngasortai amerlasuut inatsisisatut siunnersuutip siullermeerneqarnerani qitiutillugit annertuumik sammineqarput. Tamanna tunngavigalugu Aningaasaqarnermut Akileraartarnermullu Ataatsimiititaliap siunnersuutip ilusiligaanerata saqqummiunneqarnissa pillugu Aningaasaqarnermut Akileraartarnermullu Naalakkersuisoq oqaatigineqareersutut ilisimatitsiffiusumik ataatsimeeqatigaa.

Inatsisip pisariuneranut paasiuminaassusianullu tunngasumik uparuaanerit inersuarmi saqqummiunneqartut ataatsimiititaliamit maluginiarneqarput. Nunanit allanit aningaasaliinerit siuarsarneqarnissaannik aammalu nunanit allanit aningaasaliinissamut aporfiiit piiarneqarnissaannik inatsisisatut siunnersuuteqarnermi siunertat pitsaasut pisariusumik inatsisiliornik-kut maangaannartinneqarnissaat ernummatigineqartoq oqaatigineqarpoq.

Siullermeerinninnermi immikkoortoq, siuliani uparuaatigineqartumut attuumassuteqarsinnaasoq, ataatsimiititaliamit maluginiarneqartoq tassaavoq inatsisisatut siunnersuut innutaasunut pitsaasumik kinguneqarluni qanoq naapertuuttumik atuutsinnejalersinnaanersoq.

Akileraartarnermut inatsisit ilaatigut pisariusinnaammata, aammali inatsisitigut tunngaviup sunniuteqarluartup matussusiisullu pilersinnejarnissaanut tamanna pisariaqarsinnaasarmat, ataatsimiititaliamit ilisimaneqarpoq. Taamaattumillu inatsisip pisariuneratigut inatsisip siuner-

taata maangaannannginnissaa qulakkeerneqaqqullugu inatsisip atuutsinnejalernerani, ilitser-suummik suliaqarnikkut, inatsisip ingerlateqqinneqarnissaa immikkut eqqumaffigineqassasoq ataatsimiitaliamit kaammattutigineqassaaq. Tamatuma peqatigisaanik piffissap ingerlareer-nerani inatsisip atuunnerata sunniutaasalu nalilersuiffigineqarnissaat ataatsimiitaliamit kaam-mattutigineqarpoq.

Kiisalu aningaasaliisartut nunanit allaneersut nunatsinni isertitaasa nunatsinni aamma akileraaruteqaataanissaannik periarfissaq inatsisisstatut siunnersuutip siullermeerneqarnerani pitsaasutut tikanneqartut ataatsimiitaliamit maluginiarneqarpoq. Taamatuttaaq nunatsinni isertitaqarfitt amerlanerulernissaat kiisalu nunatsinni suliniutit aningaasaliisartunit nunanit allaneersunit aningaasaliiffigerusunneqarnerulersinnaanerat inatsisisstatut siunnersuutikkut ammaaneqartoq ataatsimiitaliamit maluginiarneqarpoq. Suliniutit aningaasaliisartunit nunanit allaneersunit aningaasaliiffigissallugit inatsisisstatut siunnersuutikkut kajuminnarnerulissasoq tamakkiisuunngikkaluamik isumaqataaffigineqartoq ataatsimiitaliamit oqaatigineqassaaq, aammalu oqaatigineqartariaqarluni inatsisisstatut siunnersuutip pitsaaqtissaatut taaneqartut ilumut piviusunngussanersut, taamaalillutillu innuttaasunut iluaqtaalissanersut, partiit ilaannit nalornissutigineqarmat.

Minnerungitsumillu siunnersuutip immikkoortua taanna kingulleq ataatsimiitaliamit assut pingaaruteqartutut isigineqarpoq. Inuaqatigiittut aningaasalersuisunik nunanit allaneersunik kajumissuseqalersitsisinnaanerput inuaqatigii ineriertornerannut assut pingaaruteqartutut ataatsimiitaliamit isigineqarpoq. Tamanna immikkut atuuppoq suliniutini angisoorujussuarni attaveqaasersuutinut tunngasuni, soorlu innaallagissamik mingutsitsinngitsumik, brintiliornis-samik suliniutinut atorneqartussamik, tunisassiornissamut erngup nukinganik nukissiorfilior-nernut. Tamakkuli iluatsinnissaannut pisariaqarpoq aningaasaliisartut nunanit tamalaaneersut aningaasalersuisinnaasullu paasisinnaasaannik iliuuseqarfigisinnaasaannillu akileraartarnermut inatsisitta atugassaqartitsinissaat. Suliassaqarfimmi ineriertornermut Naalakkersuisut sukumii-sumik malinnaanissaat aammalu inatsisit siunertaq naapertorlugu sunniuteqanngitsut paasine-qassappat iliuutsinik pilertortumik aallartitsinissaat ataatsimiitaliamit naatsorsuutigineqarpoq.

**6. Siunnersuutip pisortanut aningaasaqarnikkut allaffissornikkullu kingunerisassai**  
Siunnersuutip pisortanut aningaasaqarnikkut allaffissornikkullu kingunerisassai pillugit siunnersuuteqartup tamanna pillugu isumaliutissiissutip immikkoortuanı allaaserisai ataatsimiitaliamit innersuussutigineqarput.

## **7. Ataatsimiitaliap inassuteqaatai**

Siunnersuut akuerineqassasoq ataatsimiitaliami **amerlanerussuteqartut** Inuit Ataqatigii Siumullu inassutigaat.

Ataatsimiitaliami ikinnerussuteqartoq Demokraatineersoq ikinnerussuteqarluni ima oqaaseqaateqarumavoq:

*"Siullertut naqissuserlara siunnersuummi, sulisitsisuniit akilerneqarluni angalanerni akileraartarnikkut kiffaanngissuseqarneruneq atuutilerseqqinnejarnissaanut tunngasoq, Demokraatiniiit tamakkiisumik tapersersortuugatsigu. Angalanernut taakkununnga akileraarusersuiniarluni siunnersuusiorsimaneq sinnganermiit tunngaveqarpallaarpoq, maannalu aamma allaffissornikkut nukiluttorfungaatsiartoq takussuserneqarluni. Maanna inissisimaffik paasineqarmat Demokraatiniiit nuannaarutigaarput.*

*Taamaattorli siunnersuutip sinnera ajorluinnarpoq. Pineqartoq sammiveqaqimmat imartoqimmallu paasinarpooq, kisiannili siunnersuut tukanneranut naqissusiisinnasaumik, Aningaasaqarnermut Naalakkersuisup ilisimatitsilluni ataatsimeeqatigineratigut paasi-narsivoq immineruunniit siunnersuut sumoqqissaaq iluaqutaaniarnersoq ilisiman-ngimma.*

*Siunnersuuti isumaliutissiissutai naliginnaasut malillugit siunnersuut akuerinerasigut 0 koruuninik iluanaaruteqartoqassaaq. Taamaattorli siunnersuutip allaffissornerujussuar-mut annertusaassaaq aammalu IT-aaqqissuussaaneranut aningaasartuutinik annertusaas-salluni. Uteqqissavara: Iluanaarutissaq NUL, kisiannili allaffissornerujussuarmut aningaasartuutinut annertusaassaaq. Akuerineqarsinnaanngilluinnarpoq Demokraatinillu tapersersornavianngilarput.*

*Taamatuttaarlu tusarniaanermiit akissutigineqarsimasuni Grønlands Revision, Sulisitsut aammalu Grønlandsbanken akerliliissuteqarsimanera aamma immikkut isiginagiassaavoq.*

*Tamanna tunngavigalugu siunnersuut itigartinneqarnissaa inassutigaarput."*

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Asii Chemnitz Narup  
Siulittaasoq

---

Jens Frederik Nielsen  
Siulittaasup tullia

---

Mariia Simonsen

---

Peter Olsen

---

Kuno Fencker

---

Karl Tobiassen

---

Jens Napaattooq